



mjesečni Bilten

omladinska mreža bosne i hercegovine

maj
svibanj
2019.

240

Dragi prijatelji/ce,

Predstavljamo vam **MAJSKO - JUBILARNO – 240 IZDANJE** mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH. **Bilten neprekidno i redovno izlazi svakoga mjeseca još od maja 1999. Godine – već punih dvadeset godina. Svaki mjesec bilten, osim objavljivanja na web stranicama, mejling listama i društvenim mrežama, šaljemo i na oko 5.000 elektronskih adresa u BiH i vani.**

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u maju 2019.....	2
Planovi za juni 2019.	8
Mladi pišu	9
Aktivnosti članova mreže	11
Saopštenja/informacije/donatori/pozivi.....	24

Uživajte u čitanju!

AKTIVNOSTI ORC/HCA U MAJU 2019.

Svečani prijem – Britanska ambasada



Umjetnički talenti i potencijal mladih Bosanaca i Hercegovaca predstavljeni su tokom mjeseca maja članovima međunarodne zajednice, vlade i civilnog društva, na svečanom prijemu u Sarajevu. Prijem je organizirala Britanska ambasada u Sarajevu u režiji PCRC i VII Fondacije za službeno pokretanje bosanskog izdanja ASBO magazina. ASBO je nezavisna publikacija koju je kreirala D Fondacija, a PCRC je uspostavio ovo partnerstvo sa ciljem da pokaže umjetnički genij naše mladosti u nastojanju da osnaži i pruži međunarodnu platformu za razmjenu rada, ideja i mišljenja o

muzici, modi, umjetnosti i kinematografija. U narednim mjesecima časopis će biti distribuiran srednjim školama širom Bosne i Hercegovine i preveden na lokalne jezike. Učešće na svečanom prijemu u Sarajevu uzeo je Slobodan Blagovčanin.

Seminar društvenih inovacija iz oblasti izgradnje mira i pomirenja



Od 30.05. do 01.06. 2019. godine u Hotelu „Jelena“ Brčko održana je Nacionalna laboratorija za društvene inovacije za 20 predstavnika organizacija civilnog društva, javnog sektora, biznis sektora, kao i neorganizovanih građana na temu izgradnje mira i pomirenja.

Nacionalna laboratorija za društvene inovacije iz oblasti izgradnje mira i pomirenja ima za cilj da omogući međusektorskim timovima da razviju inovativna rješenja za probleme koje su organizacije identifikovale, kao i da omogući organizacijama i učesnicima da se upoznaju sa procesom društvenih inovacija i međusektorskim pristupom u zagovaranju na polju izgradnje mira i pomirenja. Seminar je koncipiran po principu neformalnog obrazovanja uz facilitaciju trenerskog tima i predstavnika projekta.





Projekat Divided Past - Joint Future (Podijeljena prošlost – Zajednička budućnost) je projekat zemalja Zapadnog Balkana (Bosna i Hercegovina, Crna Gora, Makedonija, Srbija, Kosovo*, Albanija) i Turske, na kojem radi 18 organizacija i Omladinski resursni centar Tuzla. Nosilac projekta je Omladinski Komunikativni Centar Banja Luka, a projekat je finansiran i podržan od Evropske Unije. Projekat je nastao kao odgovor na sve veću nezainteresovanost bavljenja temom pomirenja na ovim prostorima, kao i odgovor povećanim tenzijama i konfliktima na nacionalnoj i religijskoj osnovi u zemljama i između zemalja Zapadnog Balkana i Turske.

RUN Youth Empowerment Academy

Predstavnici Omladinskog resursnog centra Tuzla - Slobodan Blagovčanin i PRONI Centra za omladinski razvoj - Dejan Rađen kao jedini predstavnici iz BiH učestvuju na drugom od četiri modula "RAN Young Empowerment Academy", koju organizuje Radicalisation Awareness Network – RAN podržan od Council of the European Union. Tema akademije kao i inicijativa je prevencija nasilnog ekstremizma.



Ekspertni sastanak

U Sarajevu je od 6. do 10. maja održan sastanak eksperata za kreiranje priručnika u omladinskom radu i mentorstvu.

Razvoj sistema podrške radu s mladima rezultirao je finalnim proizvodom (novi kurikulum za rad sa mladima), koji će se koristiti u dugoročnom radu s mladima na online i offline razini. Ovaj metodološki okvir pomoći će omladinskim radnicima i mladima da organizuju i prate vlastiti napredak, učenje i doživljaj u različitim procesima, inicijativama, učenjima, konsolidiraju i prepoznaju stečene kompetencije, preuzmu odgovornost za svoj razvoj, na zabavan i kreativan način.

Ovaj finalni proizvod će biti međunarodno podijeljen sa omladinskim organizacijama, omladinskim radnicima i institucijama u oblasti mladih. Ovaj metodološki sistem će također imati za cilj osnaživanje



angažmana mladih i doprinos prepoznavanju i dokumentiranju participacije mladih i neformalnog i informalnog učenja. Metode su razvili stručnjaci, omladinski radnici iz partnerskih organizacija i vanjski stručnjaci na sastanku u organizaciji i putem online saradnje. Finalni proizvod pratiti pristup ciklusu učenja i povezuje ga sa metodologijom „Hero's journey“.

Predstavnik Omladinskog resursnog centra je bio Emir Karamujić.

Local Youth Office

Nevladina organizacija IPAK-Mladost gradi budućnost, zajedno sa partnerima: OKC Banja Luka, Grad Tuzla, Zvornik, Živinice, Općina Sapna i Kalesija, realizira projekat „Local Youth Office“, u okviru regionalnog projekta “Podijeljena prošlost – zajednička budućnost.

U okviru ovoga, 28.i 30. maja u Tuzli je organizovan trening i okrugli sto za osnivanje lokalnog ureda za mlade. Ispred Omladinskog resursnog centra na treningu i okruglom stolu učešće su uzeli Mirela Biković, Adi Čanović i Eldin Subašić.



Trening, koji je održan 28. Maja u prostorijama IPAK-MGB-a je okupio 20 mladih iz raznih organizacija, srednjih škola i lokalnih zajednica. Na treningu su učesnici, uz pomoć interaktivnih metoda, kreirali preporuke za osnivanje lokalnog ureda za mlade koje će biti predstavljene na okruglom stolu. Trener je b

Okrugli sto je održan 30. maja u hotelu "Miris Dunja 88" u Tuzli, i

okupio je oko 15 mladih predstavnika organizacija i lokalnih omladinskih vijeća, i 5 predstavnika partnerskih gradova/općina. Na okruglom stolu, su predstavnicima gradova / općina predstavljene preporuke mladih, te su zajedničkim snagama, uz pomoć interaktivnih metoda, obrađene u funkcionalan model koji će se koristiti za poboljšanje mobilnosti i aktivizma mladih, učešća mladih u donošenju odluka te povećanje platforme za interkulturalni dijalog.



Sastanak Koalicije za borbu protiv mržnje

22. maja je u Tržnom Centru Drammar održan sastanak Koalicije za borbu protiv mržnje. Na sastanku su prisustvovala članice koalicije, gdje su zajedno prodiskutovali i donijeli zaključke o pravilniku rada koalicije. Pored donošenja odluke o pravilniku rada koalicije, zajedno smo ponovno prešli prethodne aktivnosti koje smo uradili. Na sastanku koalicije je prisustvovao naš član Benjamin Burek.



Seminar o upravljanju internetom Kijev, Ukrajina

U Kijevu (Ukrajina) je od 20. do 26. maja održan seminar na temu upravljanja internetom, digitalnih prava i sigurnosti na internetu.

Ciljevi seminara su bili istraživanje tehnologije i interneta, a posebno učešće mladih na istom, prelazeći u tehnološki posredovan aktivizam. Također, istraživanje šta znači biti aktivista za digitalna prava i zašto je to važno za participativnu demokratiju, gledajući na digitalna prava u smislu tehnološke mjere kao oblik aktivizma, kao i omogućiti mladim zelenim aktivistima iz Istočne Evrope alate za pošteno, sigurno i ravnopravno učešće u web platformama, uklanjanjem rizika od autocenzure i zauzimanja za svoja (digitalna) prava.



Na seminaru su učestvovali mladi aktivisti iz Srbije, Hrvatske, Sjeverne Makedonije, Albanije, Bjelorusije, Ukrajine, Moldavije, Gruzije, Armenije, Turske, Poljske, Češke, Švicarske, Njemačke i Bosne i Hercegovine.

Predstavnik Omladinskog resursnog centra Tuzla je bio Emir Karamujić.

Konferencija u Bukureštu (Rumunija)

Rumunsko predsjedavanje vijećem EU organizovalo je, između 28. i 29. maja u Bukureštu konferenciju „Kako bolje odgovoriti na europske aspiracije mlade generacije na Zapadnom Balkanu?“.

Ovaj događaj ima za cilj da: ohrabri i podrži mlade ljude na Zapadnom Balkanu u izgradnji budućnosti u svojim zemljama, istraži fenomen odliva mozgova, posebno među mladima, i poveća nivo njihove društveno-ekonomske inkluzije; omogući uspostavljanje dugotrajnog dijaloga među mladim stručnjacima iz lokalne uprave i civilnog društva, preduzetnika, akademika, omladinskih organizacija sa Zapadnog Balkana i EU, čime se doprinosi boljem međusobnom razumijevanju i identifikaciji sa europskim vrijednostima.

Posebna pažnja je posvećena aspektima kao što su: potreba za povećanjem nivoa svijesti i konsolidacijom povjerenja, kako bi se doprinijelo naporima pomirenja i identificirala konkretna rješenja za poboljšanje demokratskog učešća među novom generacijom.

Događaj je podržan od strane Europske Komisije i EEA i Norveških grantova i organizovan je u saradnji sa regionalnim i europskim partnerima.

Predstavnik Omladinskog resursnog centra je bio Emir Karamujić.



Omladinska grupa ORC Tuzla

sSELECT EU

U periodu od 10. do 12. maja u Beogradu je održan događaj pod nazivom “sSELECT EU”, gdje su mladi imali priliku da se upoznaju sa demokratskim procedurama Evropske Unije. Kroz različite radionice i simulacije, zajedno sa više od 300 vršnjaka iz BiH, Makedonije, Srbije i Slovenije imali su priliku da razgovaraju o značaju EU politika na život mladih ljudi i važnosti učešća mladih u izbornim procesima.

“Nedostatak interesovanja za politiku” često je naveden kao glavni razlog niskog učešća mladih ljudi u izbornim procesima. Mladi smatraju da kroz političke i demokratske procese ne mogu učestvovati u oblikovanju svog života i taj posao prepuštaju drugima.

Međutim kako život mladih ljudi ne bi bio posljedica tuđeg viđenja, već rezultat njihovih potreba, neophodno je da se mladi osnaže za što veće učešće u oblikovanju EU. Evropski izbori su period kada se




Evropljani najviše interesuju za sve dobiti koje kao građani Unije imaju. Teme i debate u vezi sa Evropom otvorene su i sada se najviše duž cijelog kontinenta debatuje na pitanje “Zašto nam je Evropa potrebna?”.



Na ovoj manifestaciji učešće su uzeli naši članovi Benjamin Burek i Kenan Suljić.

Ulična akcija „Mentalna higijena“

Omladinska grupa Omladinskog resursnog centra Tuzla je 28. maja uspješno realizovala akciju pod nazivom “Mentalna higijena”, sa ciljem dizanja svijesti o mentalnom zdravlju čovjeka.



Mentalna higijena predstavlja psihološku disciplinu, čiji je cilj čuvanje, održavanje i unapređivanje mentalnog zdravlja ljudi, a mentalno zdravlje predstavlja stanje dobrog i skladnog psihičkog funkcionisanja koje podrazumijeva odsustvo duševnih poremećaja. Kako bismo obezbjedili zabavu našim članovima, tokom akcije smo im zadatke za ovu aktivnost pripremili u aplikaciji Action Bound. Koordinator aktivnosti bila je Mirela Biković, a glavna poruka akcije glasila je: UZMITE ONO ŠTO VAM JE POTREBNO!

REDOVNE AKTIVNOSTI ORC I HCA TUZLA

Tokom maja radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA JUNI 2019.

- Početak implementacije nove kampajne - „CAT 19“. U okviru ovog projekta u naredom periodu naše aktivnosti su nastavak sa partnerima, pripreme tehničkog dijela kampanje, te planiranje kampanje. U okviru ovoga, održaćemo jedan trening za mlade, te trening jačanja kapaciteta.
- Aktivnosti omladinske grupe ORC-a Tuzla
- Pripreme za početak aktivnosti ALF BH mreže (2019. – 2020)
- Nastavak apliciranja za projekte i učešće u partnerskim projektima u regiji



MLADI PIŠU:

I tvoj osmijeh nekome je dar



Piše: Nejra Borovačić

Da li ste se nekada zapitali kakav je osjećaj radovati se najljepšem prazniku, iako svjesni da nemate načina dočekati ga uz osnovne potrebe?


Upoznati sa situacijom u našoj državi, svjesni smo da je veliki broj takvih porodica, ali i rijetko humanih ljudi.

"Hajde da pokrenem humanitarnu akciju "Ramazan u Bosni i Hercegovini", i da izvučem najbolje iz društvenih mreža". I da, ovom rečenicom je sve počelo.

Živimo u vremenu u kojem mnogi koriste instagram, uglavnom za vlastitu promociju. Nedavno sam upoznala jednu djevojku, te nakon razgovora razmijenila kontakt. Naravno, pronašle smo se na instagramu gdje smo povremeno pisale. Ona je iz Austrije i studentica je četvrte godine Medicinskog fakulteta.

Inspirisana jednim od svojih pratilaca, pokrenula je humanitarnu akciju na instagram platformi, gdje zahvaljujući poznatom internetskom servisu, preko kojeg se obavljaju finansijske transakcije, PayPal-u svi zainteresovani mogu jednim klikom donirati onoliko novaca koliko žele.

Ona povremeno dolazi u Bosnu, gdje je i planirala realizovati akciju nazvanu "Ramazan u Bosni i Hercegovini". Ovoj akciji pridružilo se još troje aktivnih građana Tuzlanskog kantona.



Da zaista ima mladih ljudi koji su spremni pomoći, pokazatelj je i ova humanitarna priča. Lice ispisano borama teškog načina života, onog kojeg život nimalo nije mazio postali su realnost današnjice u kojoj odrastamo, ali prosto i način života.

Tek kada vidiš nasmijana lica djece koja se vesele bojkankama ili loptici, shvatiš onu dobro poznatu frazu "sitnice raduju čovjeka". I vjerujte da ta djeca ne pokazuju svoju tugu, nego naprotiv, njihovi osmijesi govore o sreći koju nesebično dijele, a iza koje stoji nimalo lako odrastanje.

Mladi mogu sve! Oni su kreatori sadašnjosti i budućnosti, i zato ne odustajmo. Pasivnost neka bude nepoznanica u uređivanju i čuvanju društva. I kada dođu crni i teški dani, znajte da su oni nekome svakodnevnica, a da upravo TI svojim malim doprinosom možeš pokloniti zrake sunca nečijem životu.

Ova priča ima i nastavak, nakon opštine Banovići, opštinu Živinice, a onda i posjeta najmlađima koji svoj Bajram dočekuju na Klinici za dječije bolesti UKC Tuzla.

Poželjeli smo da nam je ovo tradicija koju ćemo nizati svake naredne godine, ali i inspiracija i pokretač mladima za slične priče.



AKTIVNOSTI ČLANICA OMLADINSKE MREŽE BiH

Institut za
razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org, web:
www.mladi.org

Šta se krije iza kampanje #necudaidem?!

Institut za razvoj mladih KULT tokom mjeseca maja intenzivno je radio na kampanji #necudaidem

Početak kampanje obilježile su hiljade statusa na društvenim mrežama kojim su građani i građanke Bosne i Hercegovine, ali i regiona, prebrojavali građane koji odlaze iz države, sa istom oznakom u maju su se pojavili i 3D crteži u tri bosanskohercegovačka grada, Sarajevu, Mostaru i Banjoj Luci.

Crteži sa jedne strane simboliziraju masovni odlazak mladih, a sa druge predstavnike vlasti kao pasivne posmatrače fenomena koji državi nanosi nesagledive posljedice.



Riječ je o kampanji koju je pokrenuo i realizuje Institut za razvoj mladih KULT, a kojom se želi skrenuti pažnja predstavnika vlasti i nadležnih institucija na svakodnevne izazove mladih, problem masovnog odlaska ove populacije, ali i ponuditi načini kojim je trenutno stanje moguće mijenjati.

Odlazak mladih goruća je tema u Bosni i Hercegovini posljednjih godina. Prema rezultatima Analize o položaju i potrebama mladih koju je 2013. godine objavio Institut za razvoj mladih KULT od završetka rata do 2013. godine BiH je napustilo oko 150.000 mladih, a prema rezultatima online ankete iz 2017. godine, besperspektivnost je glavni razlog zbog kojeg se odlučuju na odlazak.

Cjelokupan koncept kampanje zasnovan je po principu društveno-korisnog djelovanja koji omogućava saradnju nevladinog sektora, korporacija, privrednih subjekata, medija i svih drugih aktera koji žele dati doprinos u kreiranju povoljnije klime za život mladog čovjeka u BiH.

Na ovakav način realizacije kampanje želi se ukazati na snagu udruživanja različitih aktera, ali i na mogućnost prevazilaženja brojnih problema uz postojanje volje i želje za aktivnim uključivanjem u društvene procese.

Konačan cilj je motivisati nadležne na preduzimanje konkretnih mjera u rješavanju problema odlaska mladih sa kojim se BiH posljednjih godina suočava.

U okviru kampanje, u narednom periodu bit će organizovan niz aktivnosti kroz koje će se nastojati ponuditi rješenja za prevazilaženje nagomilanih problema u oblasti pitanja mladih.

Partneri kampanje su Historijski muzej Bosne i Hercegovine, Kreativna agencija Purple Key, Street Arts Festival Mostar, Univerzitet Džemal Bijedić u Mostaru, Udruženje građana „Agencija za razvoj i saradnju CEREBRA Banja Luka“, N1 televizija, Klix.ba, RSG Radio, Radio Antena Sarajevo, Radio MIX i Oslobođenje.

Frenkie: I ja sam bio na korak do odlaska iz BiH

Haotičnu situaciju u Bosni i Hercegovini trebata okrenuti u svoju korist, poručio je poznati bh. reper Adnan Hamidović Frenkie mladima iz BiH koji pohađaju Institutovu obuku „Uči, misli i djeluj!“ (UMiD).

Druženje sa Frenkijem za 14. generaciju polaznika i polaznica obuke organizovano je u okviru već tradicionalnog programa "Kafa sa..." tokom kojeg Institut mladima osigurava druženje sa istaknutim javnim ličnostima. Frenki je sa mladima razgovarao o svojim životnim izazovima, načinima prevazilaženja prepreka, obrazovanju i muzičkim počecima i uspjesima, ali i odlasku mladih, problemu sa kojim se bh. društvo posljednjih godina suočava.



I sam imam iskustvo sa odlaskom bliskih osoba. Moja porodica i ja smo bili na korak do odluke da napustimo BiH, ali smo ostali jer se vrijedi boriti – istakao je Frenkie tokom razgovora sa mladima. Govorio je o pozitivnom buntu mladih, te o tome kako djelovati u lokalnoj zajednici.

Institut već duže od deset godina provodi certificiranu obuku omladinskih lidera/ki „Uči, misli i djeluj!“, koja polaznicima/ama, između ostalog, nudi mogućnost da steknu samopouzdanje, sagledaju svoje sposobnosti i potencijale te razviju osjećaj za odgovornost u društvu i steknu vještine upravljanja i bavljenja biznisom.

Razgovori sa inspirativnim javnim ličnostima iz različitih oblasti samo su jedan od načina kako potaknuti mlade da budu boljim liderima i donosiocima promjena u društvu.



Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Youth Love Festival



Youth Love Festival je projekat lokalnog tima Šamac Asocijacije srednjoškolaca u Bosni i Hercegovini. Pored Šamca, u organizaciji učestvuju i ovi lokalni timovi: Breza, Tuzla, Doboј, Sarajevo, Kakanj, Modriča, Brčko i Trebinje.

Primarni cilj ovog projekta je osnivanje lokalnih timova u zajednicama gdje ASuBiH do sada nije imao oformljen lokalni tim.

Festival je baziran na omladinski aktivizam.

“Na ideju sam došao prošle godine nakon određenih dešavanja koja su jako uticala na moj aktivizam. Razmišljao sam o svom angažmanu u Asocijaciji, i o svim neopisivo dobrim stvarima koje su mi se desile kroz ASuBiH. S obzirom da mi ova organizacija donosi pripadnost, zapitao sam se ko pruža prilike i podršku srednjoškolicima gdje nema lokalnih timova. Osjetio

sam potrebu, kao i moj cijeli tim, da poduzmemo nešto.” – izjavio je Stevan Josipović, koordinator projekta.

Kroz YLF Roadtrip cilj je okupiti mlade u gradovima koji nemaju tim, i prezentovati im rad organizacije. Pored toga, kroz interaktivne radionice nastojimo edukovati srednjoškolce o tome šta je to aktivizam, kako voditi tim i biti lider, i kakve sve mogućnosti ASuBiH može da pruži srednjoškolicima.

Finalni dio ovog projekta, gdje će se okupiti preko 50 mladih, se održava u augustu ove godine u Šamcu.

“YLF za mene predstavlja projekat koji je mnogo više od novca za finansiranje i riječi napisanih na papiru. YLF predstavlja 18 mladih ljudi koji su na sve spremni osim da mladi budu pasivni i tihi, pa su odlučili da dižu mlade na noge u svim gradovima gdje im niko drugi nije dao vjetar u leđa. YLF nije samo projekat, YLF je pitanje koje može da doprinese rješenju mnogih problema; Ako mladi shvate da mogu i da imaju moć znanja i da jedinstvo i sloga grade budućnost, šta ih može spriječiti, pošto se sa sistemom već bore? YLF je sloga jer mi znamo da možemo, a kada niko drugi ne uči mlade istome – mi smo se osjećali dužnim da obavimo društveno koristan zadatak.” – rekla je Edna Mulić, Asistent YLF-a.

“YLF je nesvakidašnja prilika koja srednjoškolicima pruža priliku da urone još vise u svijet aktivizma, steknu nova iskustva i budu nosioci jednog od najvećeg događaja u okviru čitave ASuBiH organizacije.” – Ivana Savić, članica Organizacionog tima

Mi smatramo da ovo nije projekat samo lokalnog tima Šamac. Ovo je projekat čitave Asocijacije i svakog lokalnog tima.

Svaki srednjoškolac je podjednako važan, a cilj ovog projekta vodi ka ostvarivanju misije i vizije krovne organizacije srednjoškolaca iz Bosne i Hercegovine.

4. Mental Health



“4 Mental Health” je projekat koji je nastao idejom grupe mladih ljudi od 5 članova, koji su ujedno obnašali funkciju organizacionog odbora, a oni su: Azra Sorguč, Lejla Hadžić, Arabella Lakić, Merima Halilbegović i Emin Brkić.

Projekat se realizovao u 4 lokalne zajednice: Maglaj (16.04.), Breza (26.04.), Visoko (09.05.) i Kakanj (17.05).

Održane su radionice koje su trajale 4-5h, na temu psihologije, komunikacije, emocije, mentalne higijene, stereotipa i predrasuda. Oko 100 srednjoškolaca je uzelo učešće na ovim radionicama. Jedan od najvažnijih ciljeva ovog projekta jeste razbijanje predrasuda o posjećivanju psihologa. Pored formalnog dijela naših radionica pažnju su posvetili i raznim igricama upoznavanja, team buildinga, energizera...

Kroz ovaj projekat srednjoškolci su imali priliku zamijeniti redovnu nastavu učešćem na jednoj zabavnoj i edukativnoj radionici.

Organizacioni tim smatra da su ispunili ciljeve projekte i očekuju da će učesnici stečeno znanje podijeliti sa svojim vršnjacima.

“Mi smo prezadovoljni kako smo odradili projekat. Nadamo se da se našim učesnicima ali i ostalim ljudima koji su imali priliku pogledati i čuti o projektu na radiju ili televiziji projekat svidio. Mi smo uložili mnogo truda za pripremu i sprovođenje ovog projekta. Naša poruka za kraj jeste: “Srednjoškolci, budite aktivni i sudjelujte u donošenju odluka u vašim lokalnim zajednicama”, kažu iz organizacionog tima.

- “Smatram da je ovo jako dobar projekat koji se razlikuje od ostalih projekata naše organizacije. Drago mi je što sam imao priliku raditi na njemu. Moja uloga u projektu jeste bila komunikacija i odnosi s javnošću, mislim da mi je zbog toga ovaj projekat poseban. Smatram da smo svi korektno i koncizno odradili svoj posao što nam pokazuju i rezultati. Vjerujem da se svim učesnicima i posmatračima projekat svidio, a ja jedva čekam organizirati naredne projekte” izjavio je PR menadžer projekta, Emin Brkić.



- Arabella Lakić, koordinatorica LT Breza: “4 Mental Health je projekat na koji sam preponosna. Dok se ostali pitaju da li ići ili ostati mi smo uzeli stvar u svoje ruke. Edukovali smo naše vršnjake o mentalnom zdravlju koje je jako bitno. Također, želim da napomenem da sam radila sa užasno pametnim i vrijednim ljudima, koji su uvijek bili tu za bilo kakvu pomoć. Jednostavno, treba više ovakvih stvari!”

- “Nevjerovatan je osjećaj kada projekat koji planirate dugo vremena ispadne i bolje nego što ste očekivali. Vidjeti mlade ljude, srednjoškolce, istinski zainteresovane za ono što pričate daje vam beskonačno veliku motivaciju da radite jače i bolje nego ikad. Mentalno zdravlje- tema o kojoj se ništa konkretno ne priča, prerađena je s preko 100 srednjoškolaca u 4 lokalne zajednice. Mladi, hvala vam što ste bili dio ove nevjerovatne priče!” poručila je članica Grupe volontera, Azra Sorguč.

Projekat je podržan iz Fonda Socijalnog dana!

Pozitivne priče 2019.



Već četvrtu godinu Asocijacija srednjoškolaca u Bosni i Hercegovini raspisuje konkurs za dostavljanje pozitivnih priča o iskustvima u školi.

Cilj projekta „Pozitivne priče“ jeste da se javnosti pokažu pozitivni primjeri u školama, ali i da se naglasi važnost profesora u životu jednog srednjoškolca. Ove godine odlučili smo da tema bude SLOBODNA (vi dajete naslov), ali trebat ćete svoje priče usmjeriti ka svojim profesorima. Oni nas ne uče samo formalnim lekcijama, nego i životnim! Ako jedan pravnik ne obavlja svoj posao najbolje imamo izgubljen slučaj na sudu, a ukoliko jedan stolar ne nauči obrađivati drvo, imamo nestabilnu stolicu.

Ali ako jedan profesor ne obavlja uredno svoj posao imamo izgubljenu generaciju. Pozitivne priče su tu da ruše barijere između profesora i učenika, tu su da obaraju

predrasude o odnosu profesor-učenik i tu su da pokažu heroje sa kredom u ruci koji već godinama od bosanskohercegovačke nezrele djece isklesavaju dijamante, uspješne doktore, naučnike i biznismene.

Pozitivne priče možete dostaviti na mail konkurs@asubih.ba najkasnije do 15.6.2019.

NAGRADE I PROCES ODABIRA NAJBOLJE PRIČE

Ove godine smo izmijenili proces odabira.

Korak 1: Nakon što pristignu sve pozitivne priče, komisija koju čini: član UO, predsjednik organizacije i jedan član ASuBiH-a odabrat će 10 najboljih koje ulaze u uži krug.

Korak 2: Na našoj web stranici ćemo otvoriti glasanje koje će trajati mjesec dana od dana objavljivanja užeg kruga. Glasanje će se vršiti klikom na "srce" na www.asubih.ba u kategoriji pozitivnih priča.

Napomena: Glasanje na web stranici neće odlučiti pobjednika, ali će biti plus na cjelokupan zbir bodova glavne komisije.

Korak 3: Nakon što zatvorimo glasanje, komisija koju čine: jedan profesor, književnik i urednik, odabrat će najbolju priču, a junak i autor najbolje pozitivne priče će biti nagrađeni na XII Generalnoj skupštini Asocijacije srednjoškolaca u Bosni i Hercegovini koja će se održati u mjesecu oktobru 2019.

Ovaj konkurs promovira rodno korektan/senzitivan jezik. Tamo gdje se koristi samo jedan rod, a iz konteksta je jasno da se odnosi na oba roda. Razlog korištenja jednog roda je ustupak čitljivosti teksta.

Regionalna edukacija u Mostaru

U periodu 3. – 5. maja održana je treća, ujedno i posljedna ovogodišnja, Regionalna edukacija. Edukacija je održana u Mostaru, a okupila je 20 koordinatora lokalnih timova regije Hercegovina. Tokom tri dana provedena u Mostaru učesnici su zajedno sa trenerima – članicom Upravnog odbora Emom Tutić (mentorica regije Hercegovina), Mateom Brkić (predsjednica organizacije) i Sofijom Savić (članica Grupe volontera) imali priliku nadograditi postojeće i usavršiti nove vještine na području aktivizma, volonterizma, javnog govora, lobiranja, naučiti nešto novo o formalnim dokumentima te uokviriti svoje znanje o ASuBiH-u i projektima koje sprovodi. Zadovoljni učesnici izrazili su tijekom evaluacije kako je ova edukacija odličan temelj za njihov daljnji rad u lokalnim zajednicama, u koje su se vratili motivisani.

Osvrt Mateje Brkić, predsjednice organizacije:

“Kao šlag na kraju završena je naša treća Regionalna edukacija, u Mostaru, za regiju Hercegovine. Osvrćući se na sve tri edukacije, mogu s ponosom reći da smo zaista uspjeli okupiti mlade ljude, srednjoškolce, širok čitave BiH, koji su spremni za rad, za promjene i za borbu. Koji su nositelji naše vizije i koji će sada, noseći kući znanje i motivaciju, moći još bolje i upornije raditi. Bravo moji ljudi, bravo moji srednjoškolci, bravo mi i bravo ASuBiH!”

Osvrt Eme Tutić, član Upravnog odbora i mentor regije Hercegovina:

“Ne postoje riječi kojima mogu opisati ponos koji osjećam. Zaista, jedan ovakav događaj zahtijeva detaljno planiranje i trud, ali kada vidite na reakcijama učesnika da je sve to vrijedilo, onda znate da ste na pravom putu. Ponosna sam na sve nas a pogotovo na srednjoškolce koji iznova dokazuju da su spremni mijenjati se i usavršavati, a sve sa zajedničkim ciljem- da nam svima bude bolje!”

**Osvrt Sofije Savić, član Grupe volontera:**

“Šta reći nego ponosni smo svi koji smo dali doprinos ovakvom događaju. ASuBiH svakim danom sve više raste, pa tako i mi sa njim. Svakom srednjoškolcu na prostoru Bosne i Hercegovine od srca preporučujem da dio svog vremena posvete upravo ovoj organizaciji- pokajati se nećete!”

Zahvaljujemo se Fondaciji Schüler Helfen Leben na sponzoriranju regionalne edukacije za koordinatore.



Udruženje građana "C.E.Z.A.R." Srbac

Zdravka Čelara 29, 78420 Srbac

Tel: 051 928 126

e-mail: zdravosrbac@yahoo.com

Besplatne kreativne radionice

Udruženje građana "C.E.Z.A.R." svakog petka u maju je održavalo besplatne kreativne radionice za djecu i mlade. Postoji veliki broj zainteresovane djece za kreativne radove u udruženju. U maju je preovladavala dekupaž tehnika, ukrašen je veliki broj flaša i čaša ovom tehnikom, a radovi će biti izloženi na koncertu ovog udruženja koji je planiran u junu.



Projekat "Edukativne radionice u srednjim školama RS"

U okviru projekta "Edukativne radionice u srednjim školama RS" održana je druga radionica sa srednjoškolcima u ŠC "Petar Kočić" Srbac. Radionicu su održali obučeni edukatori za radionice predstavnici UG "C.E.Z.A.R." i Lokalnog volonterskog servisa Srbac, Tanja Šnjegota i Suzana Šarić. Na ovoj radionici razvijena je ideja za projekat koji će biti finansijski podržan od Ministarstva porodice, omladine i sporta Republike Srpske. Kroz nekoliko dana počinje realizacija ovog projekta srbačkih srednjoškolaca.



Međunarodni dan porodice

Članovi Udruženja građana "C.E.Z.A.R." posjetili su Dječiji vrtić "Naša radost" u sklopu obilježavanja Međunarodnog dana porodice i mališanima ove ustanove poklonili igračke. Na ovaj način "C.E.Z.A.R." je nastavio tradiciju obilježavanja ovog značajnog datuma. Sa mališanima iz najstarije grupe razgovarali su

o porodici i njenoj važnosti, te kroz crteže upoznali članove njihove uže ali i šire porodice. Druženje je zaista bilo prijatno.



Igre bez granica

U okviru obilježavanja dana škole Osnovne škole "Jovan Jovanović Zmaj" u Srpcu, po prvi put u ovom gradu Udruženje građana "C.E.Z.A.R." organizovalo je "Igre bez granica". Oko 250 srbačkih školaraca od drugog do petog razreda uzelo je učešće u ovoj manifestaciji. Takmičenje je bilo iz sljedećih igara: trčanje u vreći, trka sa kašikom u kojoj je loptica za stoni tenis, trka sa balonima, stabilne građevine, luda štipaljka, muzičke stolice, trka sa stolicom na kraju, trka sa vijačama, vođenje košarkaške lopte i tunel. Veliki doprinos ovoj manifestaciji dali su volonteri Lokalnog volonterskog Servisa Srbac.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je nastavila sa svakodnevnim aktivnostima po redovnom rasporedu, prva grupa učesnika od 11:00-13:00 uzrasta od 4-7 godina, a druga grupa učesnika od 14:00-15:30 uzrasta 8+.

Mlađi učesnici su kreirali edukativne stvari uz pomoć lokalnih i međunarodnih volontera. Grupa najmlađih učesnika je ovaj mjesec imala priliku napraviti/nacrtati vlastitu kratku priču; učili su latinično slovo F, te da napišu svoje ime. Na kreativnom dijelu su pravili gnijezdo sa pticama, crtali i bojili kraljevstvo mira, radili na radnim listovima sa crtežima divljih životinja, te su vježbali kreiranje slike spajanjem tačaka. Jedna od zanimljivih tema za naš najmlađi uzrast je Solarni sistem i Ekologija. Namlađi drugari su čuli zanimljive činjenice o planetama i dobili savjete kako da doprinesu očuvanju naše životne sredine. Takođe su učili kako reći članove porodice na engleskom jeziku. Na muzičkim radionicama su i ovaj mjesec imali priliku muzicirati zajedno na raznim udaraljka i akustičnim instrumentima. Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, stickeri, radni listovi plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.



Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili kreacije koristeći razne materijale: planete Solarnog sistema i različite dekoracije.

Utorkom su učesnici vježbali engleski jezik i svakodnevnu komunikaciju; i ovaj su mjesec rađene igre prijateljstva, koje poboljšavaju učenje stranih jezika u grupi i timski rad. Pored ovih aktivnosti, učesnici su na muzičkim radionicama učili pisanje nota, te su vježbali akorde na klaviru. Srijedom su se održale plesne radionice i shuffle dance. Četvrtkom su se družili uz sportske aktivnosti društvene i teambuilding igre, a petkom su nastavili raditi na radionicama njemačkog i japanskog jezika. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugom i usvoje lijepo ponašanje. Koordinator radionica je bio Adin Midžić uz asistenciju lokalnih, Weltwärts i EVS/ESC međunarodnih volontera. Sve aktivnosti se održavaju u Omladinskom centru Brčko distrikta.

Radionice gitare

Učesnici ovih radionica utvrđivali su naučeno gradivo i radili na novim etidama i kompozicijama.

Radionice sambe

Učesnici ove radionice su svirali nešto starije instrumentalne kompozicije (Funk, Samba Reggae) bez električnih gitara koristeći priliku da se podsjetite ovih kompozicija te da pokažu i prenesu novim članovima šta su naučili prisustvujući ovim radionicama.

Međunarodni dan porodice



15. maja slavimo „Međunarodni dan porodice“, koji pruža priliku da se promoviše svijest o pitanjima koja se odnose na porodicu i da se poveća znanje o socijalnim, ekonomskim i demografskim procesima koji utiču na porodicu. Omladinska organizacija Svitac održala je radionicu za djecu od 4 do 8 godina na kojoj smo razgovarali o članovima porodice. Zajedno smo pjevali pjesme „Baby Shark“ i „Finger Family“. Na kraju smo od papira napravili porodicu koju su učesnici ukasili. Radionica je održana u prostorijama Omladinskog centra.

Svjetski dan kulturnih različitosti za uspostavljanje dijaloga i doprinos razvoju

Omladinska organizacija Svitac je 21.05 obilježila „Svjetski dan kulturnih različitosti za uspostavljanje dijaloga i doprinos razvoju“ sa 2 radionice. Prva radionica je bila za učesnike od 4 do 7 godina. Učesnici su učili o 7 kontinenata i koje su njihove razlike, naravno prilagođeno uzrastu učesnika. Zatim su morali da odgovore na pitanja da li su svi u grupi isti i da li svi pričamo isti jezik; odgovor na pitanje je bio da nisu svi isti, a da su tu i internacionalni volonteri. Krajnji zaključak do kojeg su trebali da dođu uz pomoć dnevnog kordinatora je da su različitosti uredu i da budu prijatelji sa drugima bez obzira na njihove različitosti. Radionica je održana u prostorijama Omladinskog centra, Brčko distrikta.



Druga grupa učesnika uzrasta 8+ je imala priliku da pogleda program koji je pripremila mreža „Promoviši pozitivno“ pod nazivom „Svjetski dan kulturnih različitosti za dijalog i razvoj“. Imali su priliku da pogledaju program u kojem su učestvovali BZK „Preporod“ Brčko, SPKD „Prosvjeta“ Brčko, HKD „Napredak“, Konfučijev institut Univerziteta u Sarajevu i Asocijacija „Kulturanova“ Novi Sad. U sklopu događaja u Gradskoj vijećnici pogledali su izložbu fotografija „Na marginama“, čiji je cilj bio da na slikovit način promoviše pozitivnu priču o Romima.

Za jun se planira nastavak svih redovnih radionica Omladinske organizacije Svitac.



PRONI Centar za omladinski razvoj

Ul. Hadži Vasvije Zejčirović 5, 76100 Brčko distrikt BiH

Tel./Fax: +387 49 217 695

E-mail: info@proni.ba

www.proni.ba

Napredni trening o zagovaranju

PRONI Centar u je sklopu projekta: “Mladi u borbi protiv nasilnog ekstremizma” organizovao je od 02.-05.05. Napredni trening o zagovaranju i aktivizmu.

Projekat je podržan od Embassy of the Netherlands in Bosnia and Herzegovina a realizuje ga PRONI Centar sa partnerima Omladinski resursni centar Tuzla – ORC Tuzla i PAX iz Holandije.

Trening je okupio krovna tijela mladih iz čitave BiH: Vijeće mladih Federacije BiH, Omladinski savjet Republike Srpske, Vijeće/Savjet mladih Brčko distrikta BiH, PRONI volontere, partnerske organizacije i druge aktivne mlade.



Trening je bio fokusiran na zagovaračke inicijative koje će sprovoditi krovna tijela mladih u BiH u naredna tri mjeseca.

Inicijative se sprovode na osnovu zaključaka iz istraživanja, preporuka sa konferencije i okruglog stola koji su sprovedeni kroz projekat “Mladi u borbi protiv nasilnog ekstremizma.”

„Izaberi Evropu“

U periodu od 9. do 12. maja 2019. godine realizovan je projekat “Izaberi Evropu” koji je podržan od strane programa Evropske unije – Evropa za građane i građanke, a koji je na opštini Vračar kroz brojne aktivnosti okupio ukupno preko 300 učesnika iz Bosne i Hercegovine, Severne Makedonije, Slovenije, Belgije i Srbije. Kroz interaktivan i dinamičan program, ovaj projekat je nastojao da uključi učesnike i građane sa lokala u EU izborne diskusije and omogući im da steknu uvid u sve benefite koje bi imali ili imaju kao građani EU.



Izaberi Evropu projekat je realizovao UG Libero u partnerstvu sa Gradskom opštinom Vračar, Proni centrom za omladinski razvoj i opštinom Bijeljina iz Bosne i Hercegovine, organizacijom Interkultura i opštinom Butel iz Makedonije, javnim zavodom Mladi Zmaji grada Ljubljane iz Slovenije, i organizacijom Connect International iz Brisela, Belgije.

Pozivi za učesnike:

Trening emocionalne pismenosti – Banja Luka (poziv je otvoren do 05.06.)
Edukatvine radionice na engleskom – Banja Luka (poziv je otvoren do 05.06.)
Od inspiracije do akcije – Bijeljina
PRONI Škola kratkog filma- Bijeljina
Menadžer društvenih mreža – Bijeljina
Citizens of EU – poziv je zatvoren
Menadžer društvenih mreža- Banja Luka- poziv je zatvoren
Trening o omladinskom radu Maoča- poziv je zatvoren
Više o pozivima i načinu prijave možete pronaći na www.proni.ba

Aktivnosti PRONI Omladinskih klubova

POK Mostar

- Perpetuum Mobile u suradnji s #POKMostar, kao lokalnim partnerom, implementira projekat "Aktivni mladi za transparentne parlamente"
- Bili smo u gostima kod Unija studenata Univerziteta "Džemal Bijedić" u Mostaru - UNMO i Studentski Zbor Sveučilišta u Mostaru.
- Omladinski radnici POK Mostar su pomogli u realizaciji radionice "Lokalna istorija - Mjesto odakle dolazim"
- Održan je prvi blok prvog modula PRONI Akademije



omladinskog rada

POK Sarajevo

- Održan je prvi blok prvog modula PRONI Akademije omladinskog rada
- Održan je drugi blok prvog modula PRONI Akademije omladinskog rada

POK Bijeljina

- Održan je treći blok prvog modula PRONI Akademije omladinskog rada



POK Banja Luka

- Održan je prvi blok prvog modula PRONI Akademije omladinskog rada
- Održana je prva radionica Obuke za menadžere društvenih mreža (Grupa 1 i Grupa 2)
- Održan je drugi blok prvog modula PRONI Akademije omladinskog rada



INFORMACIJE / DONATORI / POZIVI

Poziv za prijave na učešće na treningu za facilitatore MoviEQ radionica



International Organization for Migration (IOM)

The UN Migration Agency

Potrebne kvalifikacije i iskustvo

- Posjeduješ iskustvo u radu sa grupama i vođenju radionica;
- Dolaziš iz NVO i/ili obrazovnog sektora;
- Zainteresovan/a si za programe koji imaju za cilj razvoj i unapređenje socijalnih i životnih vještina;
- Stalno si naseljen/a u jednoj od navedenih općina: Bužim, Cazin, Prijedor, Brčko, Tuzla, Zvornik, Zavidovići, Zenica, Bugojno, Sarajevo, Istočno Sarajevo, Jablanica, Čapljina, Bileća ili Foča.
- Stečena univerzitetska diploma iz društvenih znanosti je poželjna

O metodologiji

Međunarodno iskustvo pokazalo je da zatvoreno crno-bijelo razmišljanje, koje čini oštru i nepremostivu razliku između “nas” i “njih”, ključni pokretač pojedinaca u pribjegavanju ekstremnijim pogledima na svijet oko sebe i prihvatanju ideja drugih kao svojih. Zbog toga, IOM-ova metodologija MoviEQ se bavi strukturom razmišljanja koja dovodi pojedince da se iz crno-bijelih kategorija pomjere više ka široj perspektivi.

MoviEQ radionice su razvijene od strane istraživača sa Cambridge Univerziteta i IOM-ovih eksperata kao odgovor na potrebu unaprjeđenja i razvoja kritičkog mišljenja, emocionalne inteligencije i empatije kod mladih u riziku.

Metodologija MoviEQ radionica bazira se na naučnim postavkama teorije **Integrativne kompleksnosti (IC)** koja dopire do mozgovnih procesa na dubokoj razini, omogućujući sudionicima da razviju svoje vlastite kompleksne narative, koje omogućavaju realno rješavanje problema svakidašnjice.

MoviEQ radionice sastoje se od 7 sesija, usmjerenih na različite teme vrlo bliske društvenom kontekstu mladih u njihovim lokalnim zajednicama.

Šta nudimo

- 4 dana treninga za vođenje MoviEQ radionica (septembar 2019)
- Mentorski program za finalizaciju i polaganje facilitatorskog ispita (oktobar/novembar 2019)
- Certifikat IOM-a i Cambridge Univerziteta o završenoj edukaciji
- Materijale za sprovedbu MoviEQ radionica u okviru vlastitog posla
- Mogućnost angažmana od strane IOM-a na realizaciji MoviEQ radionica

Trening program

Tri vrste učenja: iskustveno, analitičko i praktično

1. MoviEQ sesije. Iskustveno učenja

Osobnim učešćem u MoviEQ radionici doživite jedinstveno iskustvo učinka MoviEQ radionica na prolazak kroz IC putovanje. Nemojte biti analitički tijekom sesija. Prepustite se aktivnostima iz sesija i doživite percepciju budućih sudionika. Reflektirajte svoje iskustvo na kraju svake sesije.

2. Teorije. Analitičko učenje

Za dobro razumijevanje cjelokupne metodologije potrebno je dobro poznavanje teorija na kojima počiva sama metodologija. Teorija Integrativne kompleksnosti omogućava razumijevanje strukture kursa i razloga dizajniranja kursa kroz ABCD aktivnosti. Osim toga, upoznat ćete se sa teorijom promjene na koju se oslanja većina metodologija koju IOM koristi u svom radu. O principima djelovanja metodologije na promjene ponašanja uzrokovane međudejstvom lijeve i desne hemisfere, upoznat ćete se kroz sesije namjenjene neuroznanosti. Kroz ovu sesiju otkrit ćete sve o IC putovanju, te kako se događa trenutak uvida u diferencijaciju i integraciju.

3. Feedback. Praktično učenje

Kroz zadatke facilitatora i vježbe na licu mjesta usvojite osnovne facilitatorske vještine neophodne za upravljanje ovim radionicama. Osim zadataka, kroz prezentirane primjere iz prakse dobit uvid u izazove koje se pred facilitatora postavljaju. U radu u parovima dobit ćete priliku okušati se u facilitatorskoj ulozi na samom treningu, te kroz povratne informacije trenera dobiti uvid u izvedbu. Nakon svake sesije, kroz sva četiri dana, u sekciji pitanja i odgovori moći ćete dobiti dodatne informacije za segmente metodologije za koju su vam potrebna dodatna pojašnjenja.

KAKO SE PRIJAVITI

Zainteresovane osobe se pozivaju da dostave svoj CV i motivacijsko pismo elektronski na email iomsjmission@iom.int najkasnije do **15.08.2019. godine** uz napomenu **PRIJAVA ZA UČEŠĆE NA TRENINGU ZA FACILITATORE ZA IMPLEMENTACIJU MOVIEQ RADIONICA**

Closing Date: Thursday, August 15, 2019

Language English

OLX Konkurs za dodjelu stipendija



OLX.ba (PIK d.o.o. Sarajevo) raspisuje konkurs za dodjelu 10 stipendija redovnim i samofinansirajućim studentima visokoškolskih ustanova u Bosni i Hercegovini za akademsku 2019/2020. godinu.

Odluku o stipendiranju 10 studenata smo donijeli kao simboliku povodom obilježavanja 10. godišnjice uspješnog postojanja na domaćem tržištu.

Više informacija: [OLX konkurs za dodjelu stipendija](#)

UNIQA dodjeljuje novčana sredstva neprofitnim organizacijama

Uz originalnost i kvalitetu, projekti će se između ostalog vrednovati po važnosti za lokalnu i širu zajednicu.

Na natječaj za dodjelu donacija u 2019. godini prijaviti se mogu:

1. osnovne škole
2. srednje škole
3. udruge koje provode projekte za djecu i mlade, studentske udruge

4. ustanove koje skrbe o djeci i mladima

UNIQA je pokrenula projekt pod nazivom "Radost života" za dodjelu novčanih sredstava kojim poziva sva udruge i ustanove koje provode aktivnosti za dobrobit i poboljšanje kvalitete života u zajednici, posebno djece i mladih, da prijave projekte ili inicijative koji promoviraju bolji, zdraviji i aktivniji život, obogaćuju i usrećuju, a za njihovu realizaciju potrebna im je financijska podrška, priopćeno je.

Prijaviti se mogu neprofitne organizacije, sportska udruge, ustanove koje brinu o djeci i mladima, osnovne i srednje škole te druge institucije sa projektima čija bi realizacija unaprijedila kvalitetu uvjeta života u zajednici te dobrobiti djece i mladih.



Projekti mogu biti edukativni (unapređenje učenja, stjecanja i prenošenja znanja, promocija kulture, likovnog i pisanog stvaralaštva, promocija medijske ili financijske pismenosti), humanitarni (izravno pomažu djeci i omladini iz osjetljivih skupina) ili sportski (izravno utječu na bolje zdravlje djece, omladine te u konačnici bolji, aktivniji i zdraviji život). Može se prijaviti i projekt koji je već proveden (pilotiran) i prijavitelj bi ga želio proširiti i razviti.

Uz originalnost i kvalitetu, projekti će se između ostalog vrednovati po važnosti za lokalnu i širu zajednicu, koristi koju će korisnici i društvo imati od provođenja projekta te broju djece i mladih izravno uključenih u projekt, priopćeno je iz osiguravajuće kuće.

Projekt se prijavljuje putem posebnog obrasca koji se ispunjava online na internetskoj stranici UNIQA osiguranja. Rok za podnošenje prijave je 21. lipnja 2019., a sve informacije o inicijativi "Radost života" dostupne su na [poveznici](#).

Kao društveno odgovoran član zajednice, UNIQA je tijekom više od dva desetljeća poslovanja podržala desetine humanitarnih projekata, pomogla brojnim ustanovama za djecu i omladinu, obrazovnim i sportskim institucijama što nastavlja i projektom "Radost života", za sigurniji, bolji i duži život.

Pročitajte više na: <https://www.bljesak.info/gospodarstvo/tvrtke/uniqa-dodjeljuje-novcana-sredstva-neprofitnim-organizacijama/274685>

Poziv za dostavljanje projektnih prijedloga koji se finansira iz budžeta Fondacije „The Prince Claus Fund and the Goethe Institut“

Obavještavamo vas da je otvoren Poziv za dostavljanje projektnih prijedloga koji se finansira iz budžeta Fondacije „The Prince Claus Fund and the Goethe Institut“, a koji ima za cilj da pruži podršku kulturnim i umjetničkim inicijativama koje se bave hitnim pitanjima životne sredine širom svijeta.

Rok za dostavljanje projektnih prijedloga je 11. JUN 2019. GODINE u 17.00 ČASOVA (AMSTERDAMSKO VRIJEME).

Ovaj poziv za podnošenje prijedloga namijenjen je Africi, Latinskoj Americi, Aziji, Karibima i Istočnoj Evropi. Isti nastoji da podrži inicijative koje omogućavaju lokalnim lokalnim zajednicama, kao globalnim institucijama, da se kroz savremene umjetničke i kulturne intervencije uključe u prijetee promjene prirode i okoline.

Fondacija podstiče inovativne kulturne inicijative pojedinih umjetnika, kreativnih profesionalaca kao i kulturnih organizacija; posebno inicijative koje izražavaju kako kako umjetnost i novi mediji mogu da predlože rješenje za pitanja životne sredine i stvore alternative koje podržavaju održivost i podstiču saradnju i razmjenu novih ideja na globalnom nivou.

Aplikacioni formular i Smjernice za aplikante možete pogledati i preuzeti na linku:

[Application-Form Cultural-and-Artistic-Responses-to-Environmental-Change 2019 Guidelines-and-Eligibility](#)

Sve neophodne informacije o predmetnom pozivu dostupne su na sljedećem linku: <https://princeclausfund.org/cultural-and-artistic-responses-to-environmental-change>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
**Omladinski resursni centar
Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Prevod Biltena na engleski: **Emir Karamujić***

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*